

# 1 Korin

<sup>1</sup> Aya Pol, Negur nẽ oroyam Kristus Jesus nẽ aposel wõ auf nigin iweignan, neda turada Sostenes ado,

<sup>2</sup> Korin oun Negur nẽ sios ã bun, pas enei matokeneik. ã Kristus Jesus bun fateuleĩ fen, fa-teul ubodõgouf nigin iweignein, are tamo kayau ganan fire firen difar fen, neda Odug Jesus Kristus, idi neid Odug ado neda Odug ĩ yana dalesedig anidi geid weim iweignein.

<sup>3</sup> Negur neda Tamada ado Odug Jesus Kristus neid wau ifenẽya ado wau inosiya, ã bun ibodõf.

## *Pol Negur De Fiyen*

<sup>4</sup> Aya wededem ã nigin Negur de afiyẽdig, ere nigin, yogon wau ifenẽya Kristus Jesus bun ã ifenein. <sup>5</sup> Ere nigin, Jesus bunem ereb ereb ganan bun, ã kisi feleya ifenein, are ãgenei wogõ ganan ado keleĩ ganan bun, <sup>6</sup> ere nigin, Kristus nigin neda wogõya, ã bun megeir ifaren. <sup>7</sup> Anĩ nigin, ã neda Odug Jesus Kristus yaorouf nigin wauĩ fatuk unog fen, tarig mog, ã Awa Uur nẽ ege luwa taka to lau gef. <sup>8</sup> Jesus ã total irouyeik ile, idikeleya bun ilauf, anĩ bunem, neda Odug Jesus Kristus isiyouf nẽ naa bun, ã bouweĩ od sãf. <sup>9</sup> Negur ĩ, yogon Naal Jesus Kristus, neda Odug geid, ã nigal gouf nigin iweignein, ĩ ereb yef, de age fouf bagai.

## *Sios Atun Fara Fiya*

<sup>10</sup> Turau tar, aya neda Odug Jesus Kristus yana bunem total bagai arokeneik, are ã atun fara fiya

taka to ibodōf nigin, ã ganan abob nigin wauĩ tekelei yen ken, ã wauĩ ado kisi tekelei bagai ubodōgouf. <sup>11</sup> Neu turau tar, tunĩ Kloe nē ibor bun tamal dirokanan, are ã atun luwa irouya ibodok. <sup>12</sup> Aya enei wogō auf, are eig fiya, ã atun takam irok, “Aya Pol dō afef,” takam irok, “Aya Apolos dō afef,” takam irok, “Aya Pita dō afef,” takag irok, “Aya Kristus dō afef.”

<sup>13</sup> Kristus ĩ fara furu fen de? Aya Pol ĩ, ã nigin aa tetek bun dun de? ã aya Pol yanau bunem naan digunein de? <sup>14</sup> Aya Negur de afiyek, are aya ã taka to naan agunen, Krispus ado Gaius dogol naan agunēdin. <sup>15</sup> Anĩ nigin, taka nem to irōf, “Aya Pol yana nem naan agun.” <sup>16</sup> (Momoĩ, aya Stefanas nē ibor tareg naan agunēdin, anĩ teten, takag naan agunen be anĩ, to kisi afef.) <sup>17</sup> Ere nigin, Kristus ĩ aya naan agunēdiyof nigin to sur fiyan, anĩ ere, biya od wogō auf nigin sur fiyan, are Kristus nē aa tetek nē megeir to yalelauf nigin, tamo nē kisi biya wogōya anĩ bunem sã.

### *Kristus ĩ, Negur Nē Kisi Biya Ado Megeir*

<sup>18</sup> Jesus aa tetek bun laa fen ya od anĩ, idi inanakelediyof anidi bun are neneya, anĩ ere, ada isennadaf bun, od are Negur nē megeir. <sup>19</sup> Ere nigin, Negur nē Itotoya bun eig ye irok: “Aya tamo kisi biya adodo neid kisi biya daũ afalauf,

aya tamo keleĩ odug adodo neid keleĩ alelauf.”\*

<sup>20</sup> Tamo kisi biya adodo nain? Tamo keleĩ odug adodo nain? Sain enei nē keleĩ yaleya nigin luwa

---

\* 1:19: Asaia 29:14

irouya tamo nain? Negur ï tenebur enei nẽ kisi biya anĩ to neneya inon de? <sup>21</sup> Negur nẽ kisi biya bunem, tenebur tamo dogo neid kisi biya anim, Negur nigin to kelein, anĩ nigin, neneya od dedig anĩ wogõ taudig bunem, idi momoi def anidi isennẽdiya nigin, Negur wau al fen. <sup>22</sup> Juda idi memelik nẽ uris dilouf nigin dirõdig, Grik idi kisi biya anĩ dimirẽdig. <sup>23</sup> Anĩ ere, ada Kristus aa tetek bun dun anĩ wogõ taudig, od anĩ Juda idi bun, ye tũ fiya od, haiden idi bun, are neneya od, <sup>24</sup> anĩ ere, idi Juda ado Grik Negurem iweignẽdin anidi bun, Kristus ï Negur nẽ megeir, Negur nẽ kisi biya. <sup>25</sup> Ere nigin, Negur nẽ neneya kisi are, tamo nẽ kisi biya wal fiya, Negur nẽ folo reya are, tamo nẽ megeir wal fiya.

<sup>26</sup> Turau tar, ã naig be fiya ufareg mog, ã iweignein anĩ kisi gouf. Æ musei sam, tamo nẽ keleĩ bunem, kisi biya ado wowã gen. Musei sam total ado wowã gen. Musei sam yeneĩ ado wowã gen. <sup>27</sup> Anĩ ere, Negur kisi biya adodo mama ifenẽdiyof nigin, tenebur enei nẽ neneya igirnẽdin. Negur ï megeir adodo mama ifenẽdiyof nigin, tenebur enei nẽ folo reya igirnẽdin. <sup>28</sup> Negur ï tenebur enei nẽ yeneid sãsã, meleid irim lai difedig ado, erob taka sã dedig anĩ igirnẽdin, are erob ado dedig anĩ, yana sa kalauf nigin age fen, <sup>29</sup> anĩ bunem, Negur mala bun, taka nem yogo yana to yalesauf. <sup>30</sup> Negur nigin ã Kristus Jesus bun ubodõgef, Jesus ï ada nigin Negur bunem kisi biya wõ yen, are ada ï bunem madur bagai, fateul wowã tau fen, isennẽya talen. <sup>31</sup> Anĩ nigin, Negur nẽ Itotoya bun eig ye irok,

“Tamo ï yogo yana yalesef are, Odug ereb age fen anĩ nigin yana yalesauf.”†

## 2

<sup>1</sup> Turau tar, aya ã gein asi fen, Negur yaor afouf nigin wogõ ayein sain bun, aya od biya odug nem be, kisi biya odug nem to wogõ aun. <sup>2</sup> Ere nigin, aya ã geid tabodon sain, aya ereb ereb ganan wederou tu kel fen, Jesus Kristus ado, ï aa tetek bun laa fen anĩ dogol kisi afouf nigin kisi afokelen. <sup>3</sup> Sain aya ã gein asin, aya totalou sã, fatuk bagai kumĩ tererẽ aun. <sup>4</sup> Neu od ado neu wogõya, are kisi biya nẽ, wauĩ faleiya nẽ od bunem sã, Awa Uur nẽ megeir nẽ ifelnẽya bunem, <sup>5</sup> are ãgenei momoiya, tamo nẽ kisi biya bun to ibodõf, Negur nẽ megeir bun ibodõf nigin age afen.

### *Awa Uur Nẽ Kisi Biya*

<sup>6</sup> Ada kisi biya nẽ od atĩya anidi atun wogõ taudig, anĩ ere, kisi biya anĩ, are sain enei nẽ sã, sain enei nẽ uyu irouya, fau inanakelediyouf anidi neid sã. <sup>7</sup> Anĩ ere, ada, Negur nẽ waa kisi biya anĩ, wogõ taudig, are iminẽyan ibodok, teneub kare fiya sã mog Negur neda fula fiya medeĩya nigin mogo igirin anĩ. <sup>8</sup> Sain enei nẽ uyu irouya takam, kisi biya anĩ to kelein. Idi kisi biya anĩ kelein are, idi fula fiya medeĩya nẽ Odug aa tetek bun to dum. <sup>9</sup> Anĩ ere, Negur nẽ Itotoya eig ye irok kilei:

“Negur nigin waud laa fedig idi nigin Negur dodok fen anĩ,

---

† **1:31:** Jeremaia 9:24

malam taka to ilen,  
weder takam to karĩ yen,  
kisi takam to fokõ yen.”\*

<sup>10</sup> Anĩ ere, Negur yogon Awa Uurem ada bun anĩ yaor fen.

Awa Uur ĩ ereb ereb ganan fai yeledig, Negur nẽ ereb ereb ilon bagaig fai yeledig. <sup>11</sup> Tamo atun aim, tamo taka nẽ kisi keleĩ? Are tamo anĩ nẽ uurem dogol keleĩ. Age fiya bagai, tamo takam Negur nẽ kisi keleĩ sã, Negur nẽ Awa Uurem dogol keleĩ. <sup>12</sup> Ada teneub enei nẽ uur to talen, anĩ ere, ada Awa Uur Negur bun tamal talen, are ereb Negur wau sã ifanadan anĩ, ada keleĩ youf nigin age tafen. <sup>13</sup> Ada enei anĩ wogõ taudig, are tamo nẽ kisi biya bunem od difelnadan anĩ bunem sã, are od Awa Uurem ifelnadan anĩ bunem. Ada Awa Uur nẽ od bunem Awa Uur nẽ kisi wogõ taudig. <sup>14</sup> Tamo Awa Uur sã ĩ, Negur nẽ Awa Uur bun tamal ereb isif anĩ to yale iroudig, ere nigin, yogon karĩya bun, are neneya. ĩ anĩ keleĩya nigin kisi feleya sã, ere nigin, are Awa Uur adodom dogol es difedig. <sup>15</sup> Awa Uur ado tamo ĩ, ereb ereb ganan nigin es fedidig, anĩ ere, ĩ yogo taka nem to es fiyẽf. <sup>16</sup> Negur nẽ Itotoya eig ye irok:

“Aim Odug nẽ kisi kelei ken,  
ĩ faded fiyẽf?”†

Anĩ ere, ada Kristus nẽ kisi ado.

### 3

#### *Sios Bun Fara Fiya*

---

\* **2:9:** Asaia 64:4 † **2:16:** Asaia 40:13

<sup>1</sup> Turau tar, aya ã momoiya nigin atĩya gen to ayein, ã teneub enei nẽ dogol, ã Kristus bun momou gen ayein. <sup>2</sup> Aya su afenein, saaf total anĩ to afenein, ere nigin, ã anĩ nigin to saika gen. Momoi, ã gamag fau to saika gef. <sup>3</sup> ã fau teneub enei nẽ dogol ubodõgef. ã atun, kiyeĩ ado luwa irouya ibodok, anĩ nigin, ã fau teneub enei nẽ sã de? ã teneub enei nẽ tamo gen to ago gef de? <sup>4</sup> Takam irok, “Aya Pol dõ afef,” takam irok, “Aya Apolos dõ afef,” ago gouf are, ã teneub enei nẽ tamo sã de?

<sup>5</sup> Agef ilauf are, Apolos ĩ ai? Pol ĩ ai? Amã Negur nẽ kabĩ tamo dogol, amã bunem ã momoi gen, are Odugem kabĩ morou morou ifanaman kilei. <sup>6</sup> Ayam faat atenẽ di, Apolosem naan fen, anĩ ere, Negurem odugouf nigin age fen. <sup>7</sup> Anĩ nigin, faat itenẽya tamo ado naan fiya tamo are ege, anĩ ere, Negur ĩ yogo dogol odug, ere nigin, ĩ ereb odugouf nigin age fedig. <sup>8</sup> Faat itenẽya tamo ado naan fiya tamo, idi karĩya tekelei ado. Negur idi mugu mugu kabĩ dalen kilei, mala solo ifenẽdiyof. <sup>9</sup> Ere nigin, amã Negur nẽ kabĩ tura tar, ã Negur nẽ kabĩ akor, Negur nẽ fõ.

<sup>10</sup> Negur ĩ aya wau ifenẽya ifanan anĩ bunem, aya fõ inoya keleĩ biya tamo gen, fõ inoya nigin gariya anon, age afe di, taka nem anĩ teten fõ inof. Anĩ ere, tamo mugu mugu el de, lo de fen, fõ dinouf nigin lo difalauf. <sup>11</sup> Ere nigin, fõ gariya inon, are Jesus Kristus, taka nem fõ gariya fire inoya kisi feleya sã. <sup>12</sup> Tamo takam fõ gariya enei teten, gol, silwa, meein moni odug, aa, yeye be, wit turu nem fõ inouf are, <sup>13</sup> yogon kabĩ naig be

fiya are yaorouf, ere nigin, Kristus nē naa bun, anī lalan bun irousi inouf. Are yā ado wō ye di, yā anim tamo mugu mugu nē kabī nē kaū es fouf. <sup>14</sup> Ī ereb inon anī ifarlauf are, ĩ yogon mala solo yalouf. <sup>15</sup> Ī ereb inon anī isaikalauf are, ĩ agogon youf. Ī yogo Negurem kel yalouf, anī ere, ĩ yā malan tamal ulō yesiya tamo gen ibodōf.

<sup>16</sup> Ā aug are Negur nē tempel, Negur nē Awa Uur ā namein ibodōdig anī, ā to keleī de? <sup>17</sup> Taka ĩ Negur nē tempel daū fouf are, Negur ĩ tamo anī daūf irailauf, ere nigin, Negur nē tempel are fateul, are ā tempel anī.

<sup>18</sup> Ā aug to udegnēgouf. Āgenei taka ĩ, gama sain enei nē keleī bunem, aya kisi biya ado yef are, ĩ neneya wō youf bagai, are ĩ kisi biya ado wō youf nigin age fouf. <sup>19</sup> Ere nigin, Negur mala bun, teneub enei nē kisi biya are neneya. Negur nē Itotoya eig ye irok kilei, “Negur ĩ, kisi biya adodo tamo dogo neid keleī anim kor bun dilelel mog, gei fedidig,”\* <sup>20</sup> Negur nē Itotoya takag irok, “Odug ĩ keleī, kisi biya adodo tamo neid kisi, are ege.”† <sup>21</sup> Anī nigin, tamo yeneid to walesagauf! Ere nigin, ereb ereb ganan are āgenei, <sup>22</sup> Pol, Apolos, Pita, teneub enei, mata ibodōya, laa, gama be, dumen, ereb ereb ganan, are āgenei, <sup>23</sup> ā Kristus nē, Kristus ĩ Negur nē.

## 4

### *Kristus Nē Aposel Tar*

---

\* **3:19:** Job 5:13 † **3:20:** Sam 94:11

<sup>1</sup> Anĩ nigin, tamo idi, amã nigin, idi Kristus nẽ kabĩ tamo tar, Negur nẽ waa lo fiya nigin idi imeid bun inon de fen, kisi difouf. <sup>2</sup> Tamo idi ereb lo difouf nigin imeid bun inon anidi, dogo neid marau sigor dõ difef dile, age difouf anĩ, marau orof. <sup>3</sup> ã aya es wiyagef be, tamo nẽ kot bun es difiyaf, are aya to sii fiyaf. Momoi, aya yug nigineg to es afedig. <sup>4</sup> Neu kisi are karëtut, anĩ ere, anim aya mosor sã to auf. Odug im aya es fiyaf. <sup>5</sup> Anĩ nigin, es fiya nẽ sain fau wõya sã mog, to es gouf. Tari gef uleg, Odug isiyouf bun. Ì ereb gugum bun iminek anĩ lalan bun irou isi fen, tamo neid waud bun kisi ibodok anĩ yaor fouf. Sain anĩ bun, idi mugu mugu Negur bun yana odug dalouf.

<sup>6</sup> Turau tar, gama aya, ãgenei biya fiya nigin, ereb enei arokenein, aya yug ado Apolos bunem, afelnein, anĩ bunem, ã wogõya eig fiya nẽ gariya, are amã bun keleĩ walogouf, “Itotoya bun yenek anĩ to ufodulagauf.” ã anĩ keleĩ youf are, ã tamo taka anĩ yana waleseg fen, taka to lai gouf. <sup>7</sup> Ere nigin, aim õ, taka wal fiya inenok? Õ mogo ado, ere anĩ õ to walen? Õ mogo anĩ walen ouf are, ere nigin õ anĩ to walen gen, ogo yanã walesef?

<sup>8</sup> Ereb ã oroyeik ganan ã mogo ado. ã mogo safina kisi feleya bagai ubodõgef. ã mogo king wowã gen, are amã geid sã. Amã ã geid king wowã tauf nigin, ã momoi bagai king wowã gem anĩ, aya orouf bagai. <sup>9</sup> Ere nigin, aya kisi afef, Negur ì amã aposel, tamo yukesiya nigin dinenẽdig gen, tamo dilouf nigin, gĩ bun idikeleyan bagai inenaman. Saa teneub ado, are tamo ado



engel meleid bun, amã fele difamãf nigin inoman. <sup>10</sup> Amã Kristus nigin neneya mabodok, anĩ ere, ã Kristus bun kisi biya bagai ubodõgef. Amã total sã mabodok, anĩ ere, ã total ubodõgef. ã yeneĩ dalesedig, amã yanamã to dalesedig. <sup>11</sup> Kulu nem isi gama sain enei bun, amã naũ ado naan ail mayok, amã gabar masasak mafilaik, amã darau difanamak, amã fõ sã. <sup>12</sup> Amã mug imamam kabĩ total maledig. Sain amã disisnamak are, amã el fiya mafenēdidig. Amã darau difanamak are, darau anĩ faali mafedig. <sup>13</sup> Bouwamã bun od duk sain, amã molol nem od solo mafedig. Mabodok masi gama sain enei bun, amã teneub enei nē ido gen ado, ereb ereb ganan nē moto gen wõ maun.

<sup>14</sup> Aya ã mama ifeneĩya nigin enei to atotof, anĩ ere, ã neu kesu tar oboiyou gen wedereĩ arouf nigin age afef. <sup>15</sup> Ere nigin, Kristus bun, ã ten tausen kulat tamo ado, anĩ ere, ã temeĩ musei sã, are aya Kristus Jesus bun biya od bunem temeĩ wõ aun. <sup>16</sup> Anĩ nigin, aya ã madē wiyagauf nigin total bagai arokeneik. <sup>17</sup> Gariya enei nigin, aya neu kesu Timoti, ĩ Odug bun aya oboiyou ado dõ fiya biya, ã gein sur afef. Im Kristus Jesus bun, neu mata ibodõya nē suma anĩ, ã wedereĩ fokõ fouf, are aya modoũ ganan sios ganan bun afelnēdidig age fiya bagai.

<sup>18</sup> ã tunĩ, Pol ĩ amã garan to isiyouf ge fen, ã aug yeneĩ walesegen. <sup>19</sup> Anĩ ere, Odug orouf are, aya kaisã bagai ã gein asiyouf, age afe fen, aya dogo yeneid yaleseya tamo eneidi naig de wogõ def anĩ sã, anĩ ere, ereb megeir idi ado anĩ fele afouf. <sup>20</sup> Ere nigin, Negur nē tano are ege wogõya

nē sã, are megeir nē. <sup>21</sup> Ere anĩ ã oroyeik? Aya wagagã yeĩya nigin tibog ado ã gein asiyouf de, wau laa fiya ado molol bunem asiyouf?

## 5

### *Tureĩ Noli Tobonunã Ado Walelnēgouf!*

<sup>1</sup> ã atun, noli tobonunã age fiya, are haiden atuneg to wõ yedig anĩ, ibodok yeya karĩ aun. Tamo taka ĩ tama nē kayau we fedig. <sup>2</sup> Age fe di, ã aug selĩ wabigedig! Age fiya ban, ã wauĩ gudũf fen, tamo tobonunã enei inof anĩ, ãgenei uyu kũ fiya bun walelnēgouf, are deuf. <sup>3</sup> Aya bouwau ã geid to ibodok, anĩ ere, uur bun are, aya ã geid tabodok. Aya ã geid ibodõya gen, tamo enei age fen, are ĩ mogo es afiyen. <sup>4</sup> ã neda Odug Jesus yana bunem guru gouf bun, aya uur bun ã geid tabodõf, are neda Odug Jesus nē megeir ibodõf sain bun, <sup>5</sup> tamo enei Satan ima bun unenēg, anĩ bunem, mosor nē bouwa daũf iraile fen, Odug nē naa bun yogon uur isennēya yalouf.

<sup>6</sup> ã yeneĩ yaleseya are to biya. Yis naal bagai flawa obu namen kabĩ yaledig anĩ, ã to keleĩ de? <sup>7</sup> ã flawa mata yis sã gen wõ gouf nigin, yis tubu anĩ waleleg, are ã anĩ flawa mata yis sã. Ere nigin, Kristus, neda Pasa naa nē sipsip naal, sesewi difiyen. <sup>8</sup> Anĩ nigin, ada Pasa Sifa naa anĩ tarouwauf, are yis tubu, sesen ado to biya nē yis bunem sã, anĩ ere, bret yis sã, karētut ado momoi nē bret bunem age tafouf.

<sup>9</sup> Aya ã noli tobonunã dinodig tamo kayau geid to nĩgal gouf nigin, neu pas mogo atotkenein, <sup>10</sup> anĩ ere, aya teneub enei nē tamo kayau geid

to nigal gouf nigin to orok, are idi noli tobonunã, ereb ereb nigin akorouya, idegëya bunem taka nẽ safina bẽ yaleya be, idegëya waitou yana yaleseya age difedig. Æ idi geid to nigal gouf are, ã teneub enei utorõgouf. <sup>11</sup> Anĩ ere, gama aya ã bun atotof are, ã taka ï yogo nigin tura ye fen, noli tobonunã, ereb ereb nigin akorouya, idegëya waitou yana yaleseya, bou yũya od wogõya, naan yõya be, idegëya bunem taka nẽ safina bẽ yaleya age fedig, ï weim to nigal gouf. Tamo age fiya ado weim saafeg to wãgauf.

<sup>12</sup> Ere nigin aya idi sios mayarẽ difaref anĩ es afediyouf? Are, idi sios namen difaref anĩ ã to es wiyëdigef de? <sup>13</sup> Negur idi sios mayarẽ difaref anĩ es fediyouf. Are Negur nẽ Itotoya bun eig ye irok kilei, “Æ atun tamo sane anĩ walelnëgouf.”\*

## 6

### *Momoiya Tamo Kayau Atun Kot Fiya*

<sup>1</sup> Ægenei takam, taka ado fefuya yenëf are, ere nigin ï Negur nẽ tamo kayau wagedin irouleya ban, ï idi momoiya sã anidi bun, mama sã gen es fiya nigin irouledig? <sup>2</sup> Are Negur nẽ tamo kayau teneub enei es difouf anĩ, ã to keleĩ de? Æ teneub enei es gouf are, ã morõ naal bagai es fiya nigin kisi feleya sã de? <sup>3</sup> Are amã engel es mafediyouf anĩ, ã to keleĩ de? Age fouf are, mata ibodõya enei nẽ morõ es fiya nigin naig fiyauf? <sup>4</sup> Anĩ nigin, ã teneub enei nẽ morõ age fediya nigin fefuya adouf are, ã haiden idi, sios bun tamo yeneid sã

---

\* **5:13:** Diuteronomi 17:7; 19:19; 21:21; 22:21, 24; 24:7

anidi, es fiya tamo nigin ugirnēdigef de? <sup>5</sup> Aya ã mama yeĩf nigin od enei orok. Are ã atun, momoiya tamo kayau fefuya idi atun ibodok anĩ, es fiya nigin kisi biya ado tamo taka sã de? <sup>6</sup> Anĩ ere, momoiya tamo takam tura taka kiwai ifen ken, kot bun iledig, are enei momoiya sã anidi wagedin irouledig.

<sup>7</sup> Momoi bagai, ã atun abob nigin kot bun fefuya ibodok anim, ã mogo kuku gen anĩ yaoref. Ere nigin ã idi to utornēdige di, sane diyeĩf? Ere nigin ã idi to utornēdige di, didegneĩf? <sup>8</sup> Age fiya ban, ã aug udegēg fen, sane ago gedig, are ã tureĩ tar bun enei ago gedig.

<sup>9</sup> Tamo tobonunã sesen idi, Negur nē tano to akorouf anĩ, ã to keleĩ de? Are ã idi to utornēdige di, didegneĩf. Idi noli tobonunã dinodig, idi idegēya waitou yana dalesedig, idi seseirã tobonunã dinodig, tamo idi bouweid na nē sur difedig, tamo tutur, kayau tutur noli tobonunã dinodig, <sup>10</sup> idi bē daledig, idi ereb ereb safina nigin akorou dedig, idi naan dōdig, idi bou yūya od wogō dedig, idi idegēya bunem taka nē safina daledig anidi ganan, Negur nē tano to akorouf. <sup>11</sup> Are ã tunĩ age fiya anĩ ago gedig. Anĩ ere, ã mosor bun tamal kulo yein, are ã fateul inenein, are ã, Odug Jesus Kristus yana bun ado neda Negur nē Awa Uur bunem, Negur mala bun madur bagai wowã gen.

### *Noli Tobonunã*

<sup>12</sup> Taka irōf, “Aya ereb ereb ganan nigin sã age afeid kisi feleya.” Are de momoi, anĩ ere, ereb ereb ganan to isennadauf. Aya ereb ereb ganan nigin sã age afeid kisi feleya, anĩ ere, aya ereb

takam to irouna di, ferfer abodōf. <sup>13</sup> Taka irōf, “Saaf are te guroub nē, te guroub are saaf nē.” Anĩ ere, Negur anĩ ganan daũ falauf. Bouwa are noli tobonunã nē sã, anĩ ere, Odug nē, are Odug ĩ bouwa anĩ nē. <sup>14</sup> Are, Negur yogon megeir bunem Odug laa bun tamal yalesnen, are adag ĩ yalesnadauf. <sup>15</sup> ã bouweĩ are, Kristus yogo bouwa nē tunĩ anĩ ã to keleĩ de? Age fiyauf are, aya Kristus bouwa nē tunĩ ale fen, kayau bouwa na sur fedig ado bagu afouf de? Sã bagai! <sup>16</sup> Tamo ĩ yogo, kayau taka bouwa na nē sur fedig ado bagu difouf are, ĩ kayau anĩ ado bouwa tekelei youf anĩ, ã to keleĩ de? Ere nigin, Negur nē Itotoya bun eig ye irok, “Idi urom bouweid tekelei youf.”\* <sup>17</sup> Anĩ ere, taka ĩ yogo Odug ado bagu difouf are, ĩ uur bun Odug ado tekelei youf.

<sup>18</sup> Noli tobonunã bun tamal uyagauf. Mosor tunĩ ganan tamo taka inof, are ĩ yogo bouwa serē inof, anĩ ere, taka ĩ yogon bouwam noli mosor inof, are ĩ yogo bouwa bun mosor inof. <sup>19</sup> ã bouweĩ are Awa Uur Fateul nē tempel, Awa Uur Fateul are ã namein ibodok anĩ Negur bun tamal walegen are, ã to keleĩ de? ã aug, āgenei sã, <sup>20</sup> ere nigin, ã mala odugem na yaleyen. Anĩ nigin, bouweĩ anim Negur yana walesagauf.

## 7

### *Tamo Kayau Ado Bagu Fiya Nigin*

<sup>1</sup> Gama od anĩ ã utotogen nigin arokeneik, tamo ĩ kayau to yalouf, are deuf. <sup>2</sup> Anĩ ere, noli tobonunã musei bagai ibodok nigin, are tamo

---

\* **6:16:** Jenesis 2:24

mugu mugu ï yogon kayau adouf, are kayau mugu mugu ï yogon tamo adouf. <sup>3</sup> Tamo ï yogon bouwa nigin, yogon kayau to katũ fiyëf, age fiya gen, kayau ïg yogon bouwa nigin yogon tamo to katũ fiyëf. <sup>4</sup> Kayau ï yogon bouwa nẽ mudur to ibodõf, are yogon tamo nẽ, age fiya gen, tamo ï yogon bouwa nẽ mudur to ibodõf, are yogon kayau nẽ. <sup>5</sup> Æ abob nigin bouweï to katũ gouf, anï ere, ã kosë gouf nigin, sain naal bagai yo ge fen, bouweï katũ gouf, are kisi falauf. Agog fen, ã bouweï kulatun fiya anï, malai nigin, are Satanem to kisi yeïf nigin, baban ã bouweï bagu gouf. <sup>6</sup> Aya od enei karï gouf nigin orok, are ïtäfiya sã. <sup>7</sup> Tamo ganan aya gen dibodok, are aya orouf. Anï ere, tamo mugu mugu idi, Negur bun dogo neid ege luwa dalef, taka ege luwa enei, taka ege luwa anï.

<sup>8</sup> Anï ere, aya kayau tamo yaleya sã, tamo kayau yaleya sã ado, waab arokenëdif, are idi aya gen age de dibodok dilauf, are deuf. <sup>9</sup> Anï ere, idi dogo bouweid nigin kulatun fiya kisi feleya sãf are, tamo idi kayau dalouf, kayau idi tamo dalouf, ere nigin, noli kisi waud bun yã gen bobo reya anï ban, tamo idi kayau yaleya, kayau idi tamo yaleya are deuf.

<sup>10</sup> Tamo idi kayau adodo, kayau idi tamo adodo bun, aya od enei arokenëdif, are ayam sã, Odugem. Are kayau ï ne tamo to itornëf. <sup>11</sup> Anï ere, kayau ï tamo itornëf are, ï tamo taka to yalouf be, are ï yogon tamo ado komo difouf. Are tamo ï yogon kayau to iru irailauf.

<sup>12</sup> Æ tunï ganan bun, aya od enei arokenëdif,

are ayam, Odugem sã. Tura taka ã kayau ado, are kayau ã momoiya sã, anã ere, ã tamo ado ibodõya nigin oro fouf are, tamo ã kayau anã to iru irailauf. <sup>13</sup> Kayau taka ã tamo ado, are tamo ã momoiya sã, anã ere, ã kayau ado ibodõya nigin oro fouf are, kayau ã tamo anã to iru irailauf. <sup>14</sup> Ere nigin, tamo momoiya sã ã, yagon kayau bunem fateulen, are kayau momoiya sã ã, yagon momoiya tamo bunem fateulen. Age fiya sãf are, ã gereĩ tar idi karõtut to dibodõf. Anã ere, idi gama fateul dibodok.

<sup>15</sup> Anã ere, taka ã momoiya sã, iyawau fenẽ nigin oro fouf are, utornẽge di, age fouf. Suma age fiya bun, momoiya tamo be kayau, ereb taka anim to katĩ fiyek. Are Negur ã ada wau inosiya bun tabodõf nigin iweignadan. <sup>16</sup> Kayau õ, nẽ tamo usennẽf be sã be anã, naig fe di, õ keleĩ youf? Tamo õ, nẽ kayau usennẽf be sã be anã, naig fe di, õ keleĩ youf?

<sup>17</sup> Odug ada mugu mugu igirnadan kilei ado, Negur ada mugu mugu iweignadan kilei bagai, age tag, mata tabodõgouf. Are, aya sios ganan bun nun enei anof. <sup>18</sup> Sain Negur ã tamo taka iweignen, tamo ã mogo mulũ ilen de? Are tamo ã mulũ ileya sã to ilauf. Sain Negur ã tamo taka iweignen, tamo ã mulũ ileya sã de? Are tamo ã to mulũ ilauf. <sup>19</sup> Mulũ ileya are ege, mulũ ileya sã areg ege. Anã ere, Negur nẽ ãtãfiya dõ fiya anã odug bagai. <sup>20</sup> Tamo mugu mugu ã Negur iweignen sain bun, ã ibodon suma anã bun, agef ibodõf. <sup>21</sup> Sain Negur ã iweignon, õ ferfer ubodon de? Õ anã nigin to morõ yõf, anã ere, õ

ferfer itoröya nigin kisi falauf are, anĩ õ agouf. <sup>22</sup> Ere nigin, taka ã, Odugem iweignen sain bun, ferfer ibodon, ã Odug nẽ karika tamo ibodok, age fiya gen, taka ã iweignen sain bun, karika tamo ibodon, ã Kristus nẽ ferfer ibodok. <sup>23</sup> ã mala odugem na yaleyeyin. ã tamo neid ferfer to wowã gouf. <sup>24</sup> Turau tar, tamo mugu mugu ã Negur iweignen sain bun ibodon suma anĩ bun, agef Negur ado dibodõf.

<sup>25</sup> Kayau taulei nigin, aya Odug bun tamal itãfiya taka to alen. Anĩ ere, aya, taka ã Odug nẽ wau yũya bunem momoi bagai tamo wõ yen anĩ, aya neu kisi afeneik. <sup>26</sup> Gama enei nẽ morõ odug nigin, aya kisi afef, are tamo ã gama ibodok gen, agef ibodõf, are deuf. <sup>27</sup> Õ kayau ado de? Age fiyauf are, õ kayau iru iraileya nigin naab to umirẽf. Õ kayau to walen de? Age fiyauf are, õ kayau taka yaleya nigin to umirẽf. <sup>28</sup> Anĩ ere, õ kayau walef are, õ mosor to unof. Kayau taulei taka tamo yalef are, ã mosor to inof. Anĩ ere, tamo kayau dalef, kayau tamo dalef, idi mata ibodöya enei bun morõ musei dalouf, are aya morõ enei ã bun to wõ youf anĩ orouf.

<sup>29</sup> Turau tar, aya od enei arokeneik, are sain mogo tobegaf, anĩ nigin, gama sain enei ilef bun, idi kayau ado, idi kayau sã gen dibodõf; <sup>30</sup> idi maruid isif, idi to maruid isif gen dibodõf; idi waud al difef, idi waud to al difef gen dibodõf; idi ereb taka na dalef, idi ereb taka sã gen dibodõf; <sup>31</sup> idi teneub enei nẽ safina diroudif, are idi waud adok anĩ bun to dinouf. Ere nigin, teneub enei, gama agef ibodok anĩ, inanakalauf.



<sup>32</sup> Aya ã to suwẽ gouf nigin orouf. Tamo kayau sã, ã Odug nẽ kabĩ nigin kisi fedig, are ã ereb age fe di, Odug al fouf nigin kisi fedig. <sup>33</sup> Anĩ ere, tamo kayau ado, ã teneub enei nẽ bouwa isennẽya nigin kisi fedig, are ã ereb age fe di, yogon kayau al fouf nigin kisi fedig. <sup>34</sup> Age fe di, yogon kisi fara fedig. Kayau tamo sã be, kayau taulei, ã Odug nẽ kabĩ nigin kisi fedig, are ã bouwa ado uur bun fateul wõ youf nigin age fedig. Anĩ ere, kayau tamo ado, ã teneub enei nẽ bouwa isennẽya nigin kisi fedig, are ã ereb age fe di, yogon tamo al fouf nigin kisi fedig. <sup>35</sup> Aya od enei ãgenei biya fiya nigin orok, aya ã ifõyeif nigin to age afef, anĩ ere, ã madur agog fen, ã aug nigin Odug bun fara fiya sã wenẽgouf nigin age afef.

<sup>36</sup> Anĩ ere, tamo taka ã, kayau taulei yaleya nigin digirnen anĩ, ã bun tobonunã biya sã age afef ye fen, kayau ã tamo yaleya nẽ sain mogo wal fe di, tamo ã kayau yaleya nigin kisi fef are, tamo ã yogon oroya kilei age fouf. ã mosor to inof, are idi bagu difouf. <sup>37</sup> Anĩ ere, tamo ã yogon wau bun total ifar fen, taka nẽ kisim to we fiyẽf, anĩ ere, yogon oroya dõf fen, kayau taulei anĩ to yalouf nigin yogon kisi ifõf are, areg ã tutuk age fouf. <sup>38</sup> Anĩ nigin, tamo ã kayau taulei yalef are, ã tutuk age fef, anĩ ere, tamo ã kayau to yalef are, ã tutuk bagai age fef.

<sup>39</sup> Kayau ã yogon tamo fau mata ibodõf are, ã yogon tamo ado dibodõf. Anĩ ere, yogon tamo laa fouf are, ã yogon oroya dõf fen, taka bun ileya kisi feleya, anĩ ere, tamo ã Odug nigin momoi yef anĩ bun dogol. <sup>40</sup> Anĩ ere, neu es fiya bun, kayau ã

gama ibodok gen, ibodõf are, ï fatuk bagai al fouf. Aya kisi afef, are ayag Negur nẽ Awa Uur ado.

## 8

### *Saaf Idegẽya Waitou Bun Sesewi Difen*

<sup>1</sup> Gama, saaf idegẽya waitou bun sesewi difedig nigin, ada keleĩ, are ada ganan keleĩ ado. Keleĩ are yogo yana yaleseya inodig, anĩ ere, wau laa fiya anim biya yalesedig. <sup>2</sup> Tamo ï ereb taka nigin aya keleĩ yef are, ï ereb taka keleĩ youf anĩ ï fau keleĩ sã. <sup>3</sup> Anĩ ere, tamo ï Negur nigin wau laa fef are, Negur ï nigin keleĩ.

<sup>4</sup> Anĩ nigin, saaf idegẽya waitou bun sesewi difedig anĩ yõya nigin, ada keleĩ, are tenebur ein idegẽya waitou are ege, anĩ ere, Negur taka sã, tekelei dogol ibodok. <sup>5</sup> Ere nigin, saa be teneub bun, idi waitou dedig anĩ dibodok, are momoi bagai waitou musei ado odug musei dibodok, <sup>6</sup> anĩ ere, ada bun Negur tekelei dogol ibodok, are Dei, ï bun tamal ereb ereb ganan wõ yen, ï nigin ada mata tabodok. Odug tekelei dogol ibodok, are Jesus Kristus, ï bunem ereb ereb ganan wõ yen, ï bunem ada mata tabodok.

<sup>7</sup> Anĩ ere, tamo ganan enei keleĩ sã. Tamo kayau tunĩ fau idegẽya waitou nigin fatuk bagai kisi difedig nigin, sain idi saaf anĩ doko, idi saaf anĩ idegẽya waitou bun sesewi difen de fen, kisi difedig, age dife di, idi waud total sã nigin, amuyẽdig. <sup>8</sup> Anĩ ere, saafem ada Negur non to irouladauf, are ada saaf to tãf are, anim ada to daũ fadauf, ada saaf tãfeg, anim ada to isennadauf.

<sup>9</sup> Anĩ ere, ereb ã karika ago gouf anim, idi momoiya total sã anidi bun, naabura gudũ fiya to wenëdigouf nigin lo walagauf. <sup>10</sup> Ere nigin, taka ĩ wau total sã anĩ, õ keleĩ enei ado, idegëya waitou nẽ tempel bun saaf wõ mog ileyõf are, ĩ saaf idegëya waitou bun sesewi difen anĩ, kumĩ sã to yãf de? <sup>11</sup> Anĩ nigin, turã total sã, ĩ nigin Kristus laa fen, are ogon keleim ĩ daũ fiyek. <sup>12</sup> Sain ã naab enei bun tureĩ tar bun mosor unog fen, dogo neid waud total sã anĩ daũ wedigef are, ã Kristus bun mosor unogef. <sup>13</sup> Anĩ nigin, ereb aya ãf anim neu turau mosor bun inenëf are, ayam ĩ mosor bun to anenëf nigin, aya muda baban to bagai ãf.

## 9

### *Aposel Ereb Yaleya Nigin Kisi Feleya*

<sup>1</sup> Ereb takam aya katĩ fiyaf de? Aya aposel sã de? Aya Jesus neda Odug to ailen de? ã Odug bun neu kabĩ bunem to wõ gen de? <sup>2</sup> Tunĩ bun aya aposel sã be, anĩ ere, momoi bagai aya ã bun aposel. Ere nigin, ã Odug bun aya aposel kabĩ alef anĩ nẽ uris.

<sup>3</sup> Idi aya es difiyouf nigin dibodok anidi bun, isennaya od enei orok. <sup>4</sup> Amã saaf ado naan yõya nigin to kisi feleya de? <sup>5</sup> Amã, aposel tunĩ ganan, Odug nẽ tura tar ado Pita age difedig gen, kayau momoiya ado amã geid marou malauf, are to kisi feleya de? <sup>6</sup> Takag, aya ado Banabas dogol mata ibodõya nigin kabĩ malouf de?

<sup>7</sup> Aim kusĩ tamo kabĩ yale fen, yogo nigin ereb ereb na yaledig? Aim wain kabier wain iten ken, dogo neid biya to yõdig? Aim sipsip lof fen, dogo

neid su sumin to yōdig? <sup>8</sup> Aya tamo nē lo fiya bunem dogol, od enei orok de? Lo anīg enei nigin tekelei bagai to irok de? <sup>9</sup> Ere nigin, Moses nē Lo bun eig ye itoton, “Ō bulmakau, wit faat biya nē gabar loko fediyouf nigin lalai feid mog, yogon awa to ufokalauf.”\* Negur ĩ bulmakau nigin kisi fef de? <sup>10</sup> Momoi, Negur ĩ od enei ada nigin to irok de? Momoi, od enei ada nigin itoton, ere nigin, tamo teneub gudū fedig ado, tamo wit faat biya nē gabar yaleledig, idi kusu fiya sain bun dogo neid morou morou dalouf nigin waud ise fen, age difedig. <sup>11</sup> Amã ã atun āgenei uur nigin faat mararan ouf are, amã ã bun bouwa buru nē safina kusu mafouf are, anī odug biya de? <sup>12</sup> Tunī ã bun isennēya enei yaleya nigin kisi falauf are, amã idi wal fiya anī, to malouf de?

Anī ere, amã ã bun safina yaleya nigin kisi feleya enei to age mafen. Age fiya ban, amã Kristus nē biya od to naabura gudū mafouf nigin, erab erab ganam faali mafef masin. <sup>13</sup> Idi tempel bun kabī daledig anidi, dogo neid saaf tempel bun daledig, idi alta bun aruna daledig anidi, erab alta bun sesewi difen anī dale dogoledig, are ã to keleĩ de? <sup>14</sup> Naab tekelei anī bun, Odug iron, are idi biya od wogō def anidi, biya od bunem mata ibodōya nē safina dalouf.

<sup>15</sup> Anī ere, aya safina yaleya nigin kisi feleya eneidi, anī taka to age afen. Age afe fen, aya, ã aya nigin ago gouf nigin, enei to atotof. Takam yanau yaleseye enei aya bun yalelauf are, aya laa fiyauf anī orouf. <sup>16</sup> Aya biya od wogō auf sain bun, aya

---

\* **9:9:** Diuteronomi 25:4

yug nigin yanau to alesedig, ere nigin, Negurem biya od wogõ auf nigin nugo fiyadig. Aya biya od to wogõ auf are, aya bun morõ odug bagai wõ youf. <sup>17</sup> Aya neu oroya bunem kabĩ enei alouf are, aya mala yaleya kisi feleya. Are neu oroyam sã, anĩ ere, aya Negurem kabĩ ifanan nigin age afef. <sup>18</sup> Age afouf are, ere anĩ neu mala solo? Are, sain aya biya od wogõ auf, aya mala yaleya sã biya od wogõ audig, are aya biya od bun mala yaleya nigin kisi feleya anĩ to age afedig.

<sup>19</sup> Aya tamo taka nẽ sã, are aya karika, anĩ ere, aya tamo musei kisi feleya bagai gei afouf nigin, aya yug tamo ganan nẽ ferfer wõ auf. <sup>20</sup> Juda idi bun, aya Juda idi gei afouf nigin, Juda tamo gen wõ aun. Idi lo farumen dibodok anidi bun, aya yug lo farumen to abodok, anĩ ere, aya idi lo farumen dibodok anidi gei afouf nigin, aya tamo lo farumen ibodok gen wõ aun. <sup>21</sup> Idi lo sã anidi bun, aya Negur nẽ lo bun karika sã, are aya Kristus nẽ lo farumen abodok, anĩ ere, aya idi lo sã anidi gei afouf nigin, aya tamo lo sã gen wõ aun. <sup>22</sup> Idi furũya anidi bun, aya idi furũya anidi gei afouf nigin, aya tamo furũya gen wõ aun. Aya erab erab ganan kisi feleya anĩ bunem, tunĩ kel gei afouf nigin, tamo ganan bun, idi dibodok gen tobonunã age fiya gen wõ aun. <sup>23</sup> Aya biya od nigin enei ganan age afedig, are aya biya od nẽ el fiya weim talouf nigin.

<sup>24</sup> Gududuya bun, tamo ganan gududu dedig, anĩ ere, tekeleim dogol mala yaledig anĩ ã to keleĩ de? Naab age fiya bun, gududu ge fen, mala walougouf.

<sup>25</sup> Tamo ganan kodẽ wal difouf nigin age difedig anidi, ereb ereb ganan bun total bagai tai difedig. Idi mala fau sa kalauf anĩ dalouf nigin age difedig, anĩ ere, amã mala gai gai ibodkalauf anĩ yaleya nigin age mafedig. <sup>26</sup> Anĩ nigin, aya tamo gariya sã gudu redig gen, to gudu raudig. Aya yau yũdig gen, to ege imau warũ yeledig. <sup>27</sup> Anĩ ere, aya yug bouwau au ken, anĩ neu ferfer ibodõf nigin age afedig, are aya tunĩ wogõ afiyeĩd fen, aya yug mala solo yaleya nigin, kisi feleya sã to bagai wõ auf nigin age afedig.

## 10

### *Israel Neid Tubuid Tar Bun Weder Irouya Od*

<sup>1</sup> Turau tar, aya ã enei to keleĩ youf nigin to orouf, are Moses nẽ sain bun, tubuda tar ganan budũ farumen difar fen, idi ganan Maaĩ Giriya atu diyok dilen. <sup>2</sup> Idi ganan budũ bun ado maaĩ bun naan dale fen, Moses nẽ ibor tar wowã den. <sup>3</sup> Are, idi ganan uur nẽ saaf tekelei anĩ don, <sup>4</sup> idi ganan uur nẽ naan tekelei anĩ don, are uur nẽ meein idi geid weim diyok dilen anĩ bun, idi naan don, meein are Kristus. <sup>5</sup> Anĩ ere, Negur ã idi musei ganan nigin wau to al fen, anĩ nigin, dogo neid bouweid gerere tuan firagagaũ difen.

<sup>6</sup> Enei ganan ada wederada irouya nigin wõ yen, anĩ bunem ada idi age difen gen, ereb sane nigin wauda to tanouf. <sup>7</sup> Idi neid tunĩ gen, ã idegẽya waitou yana to walesagauf. Are Negur nẽ Itotoya bun eig ye irok, “Tamo kayau saaf naan

doko dibod ken, fafã de dale, noli tobonunã dinon.”\* <sup>8</sup> Ada idi tunĩ age difen gen, noli tobonunã to tanouf. Age dife di, naa tekelei bun, idi atun tuwenti tri tausen tamo kayau gare den. <sup>9</sup> Ada idi tunĩ age difen gen, Odug kisi fiya bun to tanenëf. Idi age difen, gogourum didenkesin. <sup>10</sup> Ada idi tunĩ gen, to nauseir tauf. Idi age difen, daũ fiya nẽ engelem idenkesin.

<sup>11</sup> Eneidi ada ifelnadauf nigin idi bun wõ yen, are idikeleya sain, ada bun mogo wõ yen anĩ bun, wederada irouya nigin itoton. <sup>12</sup> Anĩ nigin, taka ĩ kisi fef, total ifaref yef, ĩ to kubũ youf nigin lo falauf. <sup>13</sup> Kisi fiya ganã bun wõ yedig, are tamo bun wõ yedig dogol. Anĩ ere, Negur ĩ age afouf yef anĩ, age fedig, ĩ kisi fiya ã yaleya kisi feleya sã anĩ, ã bun to wõ youf nigin age fouf. Anĩ ere, ã kisi yeif sain bun, Negur ĩ iyawoya nẽ naab anĩg ifelneif, anĩ bunem ã total ufaragauf nigin sã kisi falauf.

### *Saaf Idegëya Waitou Bun Dinon Ado Odug Nẽ Saaf*

<sup>14</sup> Anĩ nigin, neu turau tar oboiyou, idegëya waitou yana yaleseya bun tamal uyalalagauf. <sup>15</sup> Aya ã tamo kayau kisi biya ado gen arokeneik, ereb aya arok anĩ, ã aug es gouf. <sup>16</sup> De fiyëya nẽ kap, ada de fiya tafenëdig, are Kristus nẽ naud bun bagu fiya sã de? Bret ada mumã tafedig, are Kristus nẽ bouwa bun bagu fiya sã de? <sup>17</sup> Bret tekelei dogol ibodok nigin, ada musei, anĩ ere, bouwada tekelei, ere nigin, ada ganã bret tekelei anĩ bun bagu tafedig.

---

\* **10:7:** Eksodas 32:6

18 Israel tamo kayau nigin kisi walogouf, idi sesewi fiya nē saaf dōdig anidi, alta bun to bagu difedig de? 19 Age foug are, ere anī kisi afef, are sesewi fiya nē saaf idegēya waitou difenek anī odug de, oo idegēya waitou anī odug de? 20 Sā, anī ere, haiden neid sesewi fiya anī kaa sesen bun difenēdidig, are Negur bun sā. Are aya ā kaa sesen geid bagu gouf nigin to orouf. 21 Ā Odug nē kap bun ado kaa sesen neid kap buneg yōya nigin kisi feleya sā. Ā Odug nē tebol bun ado kaa sesen neid tebol buneg bagu fiya nigin kisi feleya sā. 22 Ada Odug kiyēī ifanadauf nigin age tafef de? Ada neda megeir ī wal fiya de?

*Momoiya Tamo Kayau Neid Tobonunā*

23 Tunī dirōdig, “Ada erēb erēb ganān nigin, sā age tafēid, age fiya nigin kisi feleya,” anī ere, erēb erēb ganān to isennadauf. Tunī dirōdig, “Ada erēb erēb ganān nigin, sā age tafēid, age fiya nigin kisi feleya,” anī ere, erēb erēb ganān biya fiya to inouf. 24 Taka ī yogon biya fiya nigin to imirēf, anī ere, tunī neid biya fiya nigin imirēf.

25 Erēb erēb yaro maket bun na sur difedig anī, āgenei kisi bun to fiya sā wāgauf, 26 ere nigin, “Teneub ado erēb erēb ganān anī namen yenek are Odug nē.”†

27 Momoiya sā tamo taka, saaf yōya nigin ā iweigneī di, ā ileyā nigin oroyēīf are, erēb erēb ā meleī bun inodin anī, āgenei kisi bun to fiya sā wāgauf. 28 Anī ere, taka ī ā irokeneīf, “Enei are sesewi fiya bun difenen,” youf are, tamo

---

† 10:26: Sam 24:1



irokenein ĩ nigin ado kisi es fiya yaor karētut ibodōf nigin, saaf anī to wāgauf. <sup>29</sup> Neu wogōya nē gariya are, tamo anī nē kisi es fiya nigin, are āgenei kisi es fiya nigin sā. Taka nem irōf, “Age fiyauf are, ere nigin neu ereb ereb nigin kisi feleya anī, tamo taka nē kisim es fouf? <sup>30</sup> Aya de fiya bunem saaf āf are, ere nigin taka nem saaf anī nigin, Negur de afiyek nigin bou yūya od irok?”

<sup>31</sup> Anī ere, ā saaf wāgauf, naan wāgauf ado, ereb ereb ganan ago gouf are, Negur nē fula fiya medeīya nigin anī ganan ago gouf. <sup>32</sup> Juda tamo, Grik tamo be, Negur nē sios bun tamo taka, to ye tū fouf nigin ago gouf. <sup>33</sup> Ayag naab ganan bun tamo ganan al afiyēdiyof nigin age afedig gen, ago gouf. Ere nigin, aya neu biya fiya to amirek, anī ere, musei isennēdiyof nigin, dogo neid biya fiya amirek.

## 11

<sup>1</sup> Ayag Kristus madē afiyēdig gen, ā aya madē wiyagauf.

### *Negur Yana Yaleseya Bun Mudur Kerū Fiya*

<sup>2</sup> Aya ā yeneī alesef, ere nigin, ā ereb ereb ganan bun aya nigin karī weleg fen, ifelnēya anī aya ale fen, ā afenein anī, kafī weleg uroug usigef.

<sup>3</sup> Anī ere, aya ā eig fiya anī keleī youf nigin orouf, are tamo ganan neid mudur are Kristus, kayau nē mudur are tamo, Kristus nē mudur are Negur. <sup>4</sup> Tamo ganan, taka ĩ yogon mudur kerū fel fen, kosē yef be, profet od wogō yef, ĩ yogon mudur Kristus mama ifenek. <sup>5</sup> Kayau ganan,

taka ï yogon mudur to kerũ fel fen, kosẽ yef be, profet od wogõ yef, ï yogon mudur, are aiwa anĩ mama ifenek, are ï yogon fatiya korerẽ feleya gen. <sup>6</sup> Kayau taka ï yogon mudur kerũ fiya sãf are, ï yogon fatiya gudũ falauf. Kayau taka ï yogon fatiya gudũ foug be, korerẽ foug anim, mama ifenẽf are, ï yogon mudur kerũ foug. <sup>7</sup> Tamo taka ï yogon mudur to kerũ foug, ere nigin, ï Negur nẽ malakanon ado fula fiya medeĩa, tamo bun. Anĩ ere, kayau ï tamo nẽ fula fiya medeĩa, kayau bun. <sup>8</sup> Ere nigin, tamo ï kayau bunem to isin, anĩ ere, kayau ï tamo bunem isin. <sup>9</sup> Takag, tamo ï kayau isennẽf nigin to inon, anĩ ere, kayau ï tamo isennẽf nigin inon. <sup>10</sup> Age fiya nigin, kayau ï, engel idi neid meleid bun, ï tamo farumen ibodok anĩ ifelnẽdiyof nigin, yogon mudur kerũ foug.

<sup>11</sup> Anĩ ere, Odug bun kayau ï tamo bun yogo mugu to ifaref, tamo ïg kayau bun yogo mugu to ifaref. <sup>12</sup> Ere nigin, kayau ï tamo bunem isin gen, tamo ïg kayau bunem wõ yen. Anĩ ere, ereb ereb ganan Negur bun tamal isif. <sup>13</sup> ã aug es gouf, are kayau taka ï yogon mudur to kerũ fel fen, Negur kosẽ fiyek, are de de? <sup>14</sup> Tamo taka fatiya salo isiya adouf anim mama ifenek anĩ, tamo nẽ tobonunã anĩ to ifelneik de? <sup>15</sup> Anĩ ere, kayau taka ï fatiya salo isiya adouf, are yogon fula fiya medeĩa. Ere nigin, fatiya salo isiya are, yogon mudur kerũ fiya nigin ifenen. <sup>16</sup> Anĩ ere, taka ï od enei kiwai ifenẽf are, ada suma taka sã, Negur nẽ sios buneg suma taka sã.

*Odug Nẽ Saaf*

*(Matyu 26:26-29; Mak 14:22-25; Luk 22:14-20)*

<sup>17</sup> Faded fiya dō fiya enei bun, aya ã yeneĩ to alesef, ere nigin, āgenei guru fiya biya anĩ fotokar sane isidig. <sup>18</sup> Uruwa bun, aya karĩ aun, are ã sios nigin guru gef ã atun, fara fiya yenēdig, age afe fen, od tunĩ aya momoi auf. <sup>19</sup> ã atun fara fiya bagai yenek, anĩ bunem, ã atun ai anĩ Negur yo fiyen anĩ ifelneif. <sup>20</sup> Anĩ nigin, sain ã guru gef, are Odug nē Saaf bagai anĩ to wōgedig, <sup>21</sup> ere nigin, sain ã saaf wōgef bun, ã abob tari fediya sã, mugu mugu saaf wōgedig, anĩ nigin, taka ĩ naũ ibodōdig, taka ĩ naan yōdig. <sup>22</sup> Saaf ado naan yōya nigin ã fō sã de? ã Negur nē sios lai ge fen, idi safina sã anidi mama wenēdigef de? Aya ã ere ayeif? Aya enei nigin ã yeneĩ alesauf de? Sã bagai! Aya enei nigin ã yeneĩ to alesauf.

<sup>23</sup> Ere nigin, aya enei Odug bun tamal ale fen, āg afenein. Are Odug Jesus, Judas ĩ kiwai ifenen bō anĩ bun, bret yale, <sup>24</sup> Negur de fiye ken, bret anĩ mumãf fen, iron, “Enei neu bouwau, are ã nigin. Aya nigin karĩ walagauf nigin enei ago gouf.” <sup>25</sup> Naab tekelei bun, bō saaf bure difel fen, ĩ kap yale fen, iron, “Kap wain enei neu naudou bun bar itenēya mata. Sain ganan ã wāgauf, aya nigin karĩ walagauf nigin enei ago gouf.” <sup>26</sup> Ere nigin, sain ganan ã bret enei wōg fen, kap enei bun wāgauf, ã Odug nē laa nigin kurō wesig mog, ĩ fau isiyouf.

<sup>27</sup> Anĩ nigin, taka ĩ tutuk sã bret anĩ yãf be, Odug nē kap bun yãf are, ĩ Odug nē bouwa ado naud bun mosor inouf. <sup>28</sup> Taka ĩ yogo nigin es fel fen, bret anĩ yoko, kap anĩ bun yãf. <sup>29</sup> Ere nigin, taka ĩ Odug nē bouwa nigin to kisif fen, bret

yoko, kap bun yāf are, ï yogon es fiya anï yogo yoko. <sup>30</sup> Anï nigin, ã atun musei malegeid fen, dagi didig, āgenei tunï gare den. <sup>31</sup> Anï ere, ada nigin es tafouf are, ada es fiya bun to tabodōf. <sup>32</sup> Sain ada Odugem es fadauf, are ada Odugem madur fadauf, are ï teneub enei nē tamo kayau geid ada mosor ado to youf nigin age fouf.

<sup>33</sup> Anï nigin, neu turau tar, sain ã yōya nigin guru gouf are, ã abob nigin tari gouf. <sup>34</sup> Taka ï naũ fouf are, ï fō bun yāf, anï bunem, sain ã guru gouf, ã es fiya bun to ulagauf.

Sain aya asiyouf, aya faded fiya tobol afeneïf.

## 12

### *Awa Uur Fateul Nē Ege Luwa*

<sup>1</sup> Turau tar, aya ã Awa Uur Fateul nē ege luwa nigin to keleï youf anï to orouf. <sup>2</sup> Ā keleï, sain ã haiden ubodōgen, naab fire fire bun ditonei ken, eweid ifofakeleya idegēya waitou bun, fō yeleya nigin dirou dileyein. <sup>3</sup> Anï nigin, aya ã arokeneik, are taka ï Negur nē Awa Uur bunem wogō yef, ï to irōdig, “Jesus sane lauf.” Takag, taka nem eig ye irōya kisi feleya sā, “Jesus ï Odug,” are Awa Uur Fateulem dogol.

<sup>4</sup> Ege luwa nigin fire fire dibodok, anï ere, Awa Uur anï tekelei. <sup>5</sup> Kabï gariya fire fire dibodok, anï ere, Odug tekelei. <sup>6</sup> Kabï nē megeir fire fire dibodok, anï ere, Negur tekelei ï, tamo ganan bun, kabï nē megeir ganan nigin kabï yaledig.

<sup>7</sup> Tamo ganan isennēdiyof nigin, tamo mugu mugu bun Awa Uur yaor fedig. <sup>8</sup> Taka bun Awa Uur bunem kisi biya nē od ifenek, taka bun Awa

Uur tekelei bunem keleĩ nẽ od ifenek, <sup>9</sup> taka bun Awa Uur tekelei bunem momoiya anĩ ifenek, taka bun Awa Uur tekelei anĩ bunem dagi el fiya nẽ ege luwa ifenek, <sup>10</sup> taka bun memelik inoya nẽ megeir ifenek, taka bun profet od ifenek, taka bun uur es fiya ifenek, taka bun od fire fire nem wogõya ifenek, taka bun od fire fire nem wogõya anĩ falei fiya ifenek. <sup>11</sup> Enei ganan Awa Uur tekelei dogol ĩ yogon kabĩ, ĩ yogon oroya dõf fen, tamo kayau mugu mugu anĩ ifenẽdidig.

### *Bouwa Tekelei, Fara Fiya Musei*

<sup>12</sup> Bouwa anĩ tekelei, anĩ ere, bouwa anĩ fara fiya musei bunem inof. Yogon fara fiya ganan are musei, anĩ ere, idi bouwa tekelei dinof. Kristus ĩg age fiya. <sup>13</sup> Ere nigin, ada ganan, Juda tamo be Grik tamo, ferfer be kafĩ fiya sã tamo, Awa Uur tekelei bunem naan tale fen, bouwada tekelei wõ taun, agef fen, ada ganan Awa Uur tekelei naan gen tokon, megeir talouf nigin ifanadan.

<sup>14</sup> Bouwa ĩ fara fiya tekeleim to inof, anĩ ere, fara fiya museim inof. <sup>15</sup> Ye ĩ, aya ima sã, anĩ nigin, aya bouwa nẽ tunĩ sã youf, anĩ ere, gariya anĩ bun ĩ aya bouwa nẽ tunĩ sã yeya kisi feleya sã. <sup>16</sup> Takag, weder ĩ, aya mala sã, anĩ nigin, aya bouwa nẽ tunĩ sã youf, anĩ ere, gariya anĩ bun ĩ aya bouwa nẽ tunĩ sã yeya kisi feleya sã. <sup>17</sup> Bouwa adok malauf are, nainenem karĩ wouf? Bouwa adok wederouf are, nainenem sumeĩ walouf? <sup>18</sup> Anĩ ere, momoi, Negur ĩ bouwa nẽ fara fiya, ĩ orof kilei bagai, mugu mugu ganan inenẽdin. <sup>19</sup> Bouwa nẽ fara fiya anĩ ganan tekelei youf are, bouwa ĩ nain ibodõf? <sup>20</sup> Age fiya gen, bouwa

ně fara fiya musei dibodok, anĩ ere, bouwa de tekelei.

<sup>21</sup> Mala ima to irokeněf, “Aya õ to orouf!” Are, mudur ye to irokeněf, “Aya õ to orouf!” <sup>22</sup> Age fiya ban, bouwa ně fara fiya tunĩ total sã tailedig anĩ sãf are, bouwa ibodõya kisi feleya sã. <sup>23</sup> Ada bouwa ně fara fiya yana sã gen tauf anĩ, ada yana talesedig. Ada bouwa ně fara fiya yaor fiya kisi feleya sã anĩ, dede ta, ed tafedig, <sup>24</sup> anĩ ere, bouwada ně fara fiya yaor fiya kisi feleya anĩ, ada to dede ta, ed tafedig. Anĩ ere, Negur ĩ bouwa ně fara fiya bagu feleid fen, fara fiya yana sã idi yana odug ifenědin, <sup>25</sup> anĩ bunem, bouwa bun foi fiya to ibodõf, anĩ ere, bouwa ně fara fiya idi abob nigin kilei kilei kisi difouf. <sup>26</sup> Bouwa ně fara fiya takam darau yalouf are, bouwa ně fara fiya ganan ĩ geid darau daledig. Bouwa ně fara fiya takam yana yalouf are, bouwa ně fara fiya ganan ĩ geid kulĩ dedig.

<sup>27</sup> Gama, ã Kristus ně bouwa, are ã mugu mugu anĩ ně fara fiya. <sup>28</sup> Sios bun Negur ĩ uyulil aposel ganan igirnědin, anĩ dõ fiya profet, anĩ dõ fiya tise, age fe di, memelik inoya tamo ado, dagi el fiya ně megeir dalen anidi, tunĩ isennědiya nigin kisi feleya anidi, ereb ereb lo fiya nigin megeir dalen anidi, od fire fire nem wogõya nigin kisi feleya anidig igirnědin. <sup>29</sup> Idi ganan aposel de? Idi ganan profet de? Idi ganan tise de? Idi ganan memelik dinof de? <sup>30</sup> Idi ganan dagi el fiya ně megeir dalef de? Idi ganan od fire fire nem wogõ def de? Idi ganan od fire fire nem wogõya anĩ falei difef de? <sup>31</sup> Anĩ ere, Awa Uur ně ege luwa

odug yaleya nigin kisi total walogouf.

Gama aya naab gai biya bagai taka afelneĩf.

## 13

### *Wau Laa Fiya*

<sup>1</sup> Aya tamo nẽ od fire fire nem ado engel nẽ od nem wogõ aufeg, wau laa fiya sãf are, aya belo gaõya be, kadod ait gũya gen dogol. <sup>2</sup> Aya profet od wogõya nigin Awa Uur nẽ ege luwa ado fen, Negur nẽ waa ganan ado keleĩ ganan kelei ken, arei godo fiya nigin momoiya odug ado, anĩ ere, wau laa fiya sãf are, aya tamo ege. <sup>3</sup> Aya erab aya ado ganan maleg afeneĩd fen, bouwau atorõ di, yã malan dirãf, anĩ ere, aya wau laa fiya sãf are, aya mala biya taka to alouf.

<sup>4</sup> Wau laa fiya are molol, wau laa fiya are dor yaleya. Ĩ to kiyeĩ inodig. Ĩ yogo yana to yalesedig. Ĩ yogo to seli yabidig. <sup>5</sup> Ĩ tobonunã sane sã, ĩ yogo nigin aya dogol to yedig, ĩ kaisã to seye yedig, ĩ sane difiyek anĩ to karĩ yeledig. <sup>6</sup> Wau laa fiya anĩ sane nigin to kulĩ yedig, anĩ ere, momoi nigin kulĩ yedig. <sup>7</sup> Ĩ faimud kulatun fedig, ĩ faimud momoi yedig, ĩ faimud wau isedig, ĩ faimud feseya sã megeir ifaredig.

<sup>8</sup> Wau laa fiya are to bagai sa kalauf. Anĩ ere, profet od wogõya are sa kalauf, od fire fire nem wogõya are sa kalauf, keleĩ are sa kalauf. <sup>9</sup> Ere nigin, ada keleĩ tunĩ dogol kelei ken, profet od tunĩ dogol wogõ taudig, <sup>10</sup> anĩ ere, sain kibo feleya bagai anĩ isiyouf, kibo feleya bagai sã anĩ sa kalauf. <sup>11</sup> Aya simõ bun, aya simõ gen wogõ aun, aya simõ gen kisi afen, aya simõ

gen karĩ aun. Sain aya biyau fen, aya simõ nẽ tobonunã dumeun arailen. <sup>12</sup> Gama ada dodo bun gen malakanon yaor sã tailedig, sain ada tarabã fadauf bun tutuk bagai tailauf. Gama aya tunĩ dogol keleĩ, sain anĩ bun Negur aya nigin ganan keleĩ gen, aya ganan keleĩ youf.

<sup>13</sup> Are gama towo eneidi difaref, momoiya, wau iseya ado, wau laa fiya. Anĩ ere, anĩ atun wau laa fiya anĩ odug bagai, ganan wal fiya.

## 14

### *Profet Od Wogõya Ado Od Fire Fire Nem Wogõya Nigin Awa Uur Nẽ Ege Luwa*

<sup>1</sup> Wau laa fiya nẽ naab dõg fen, Awa Uur nẽ ege luwa yaleya nigin kisi total walogouf, Awa Uur nẽ ege luwa bun profet od wogõya nẽ anĩ bagai walogouf. <sup>2</sup> Ere nigin, taka ã od fire nem wogõ yef, ã tamo to wogõ fiyẽdif, anĩ ere, ã Negur wogõ fiyek. Are, taka nem in od to keleĩ youf. ã Awa Uur bunem Negur nẽ waa wogõ yef. <sup>3</sup> Anĩ ere, taka ã profet od wogõ yef, ã tamo megeir ifenẽdiyof nigin, waud yalesauf nigin ado, waud yo fof nigin wogõ fiyẽdif. <sup>4</sup> Taka ã od fire nem wogõ yef, ã yogo dogol isennek, anĩ ere, taka ã profet od wogõ yef, ã sios isennek. <sup>5</sup> Aya ã ganan od fire fire nem wogõ gouf nigin orouf, anĩ ere, aya ã profet od wogõ gouf nigin orouf bagai. Taka ã od fire nem wogõ yef, ã sios isennẽf nigin taka nem yogon od to falei fof are, taka ã profet od wogõ yef anim, taka ã od fire nem wogõ yef anĩ wal fiya.

<sup>6</sup> Turau tar, aya ã gein asi fen, od fire nem wogõ auf sain bun, aya kurõ fesiya od tunĩ, keleĩ, profet



od be, faded fiya nē od, ã bun to arou asiyouf are, ere biya aya ã afeneĩf? <sup>7</sup> Ereb idi mata sã aitedif, digē be gita age fiya, idi ailō fire fire to dinouf are, naig fe di, taka nem ere seg kodē def anī keleĩ youf? <sup>8</sup> Takag, taur ait tutuk to wō youf are, aim kusī nigin dodok foug? <sup>9</sup> ãg age fiya. ã, āgenei baleim od fire nem yaor to wogō gouf are, taka ĩ naig fe fen, ã wogō gef anī keleĩ youf? ã ege od yau bun urarāgouf dogol. <sup>10</sup> Tenebur ein od fire fire musei dibodok, anī ere, idi gariya sã taka to ibodok. <sup>11</sup> Aya ereb taka nem wogō yef, anī nē gariya to keleĩ youf are, aya wogō yef anī nē yaũ tamo, age fe di, ĩ aya bun yaũ tamo. <sup>12</sup> ãg age fiya. ã Awa Uur nē ege luwa yaleya nigin kabĩ total walegedig, anī nigin, sios isennēya nē ege luwa yaleya nigin kabĩ total walougouf.

<sup>13</sup> Age fiya nigin, taka ĩ od fire nem wogō yef, ĩ ereb wogō yef anī falei foug nigin kosē youf. <sup>14</sup> Ere nigin, aya od fire nem kosē auf are, neu uur kosē yef, anī ere, neu kisi faat yūya sã. <sup>15</sup> Anī nigin, aya naig afoug? Aya neu uur bun kosē auf, anī ere, aya neu kisi buneg kosē auf. Aya neu uur bun seg aloug, anī ere, aya neu kisi buneg seg aloug. <sup>16</sup> Õ ogon uur bun Negur yana walesauf are, taka ĩ idi anī to keleĩ anidi atun ibodok, ĩ ereb õ urok anī keleĩ sã nigin, naig fe fen, ĩ ogon de fiyēya bun “Momoi” youf? <sup>17</sup> Õ ogon de fiya are biya bagai, anī ere, taka to usennek.

<sup>18</sup> Aya ã ganan wal yeīya, od fire nem wogō auf nigin Negur de afiyek. <sup>19</sup> Anī ere, sios bun, aya ten tausen od od fire nem wogōya anī fotokar, tunī tai fediya nigin od faif bun yaor wogō auf anī oroug.

<sup>20</sup> Turau tar, āgenei kisi bun simō gen to ufareg. Sane nigin, momou nē kisi gen ufareg, anī ere, āgenei kisi bun biyeī ufareg. <sup>21</sup> Lo bun eig ye itoton:

Odug irok,

“Tamo od fire nem wogō def anidi bunem ado, yaū tamo sigoreid bunem, aya tamo kayau eneidi wogō afediyouf, anī ere, sain anī buneg idi aya to karī difiyauf.”\*

<sup>22</sup> Anī nigin, od fire nem wogōya are, momoiya tamo kayau bun uris sã, anī ere, momoiya sã tamo kayau bun uris. Anī ere, profet od wogōya are, momoiya tamo kayau bun, momoiya sã tamo kayau bun sã. <sup>23</sup> Anī nigin, sios guru fiya odug bun, tamo kayau ganan od fire nem wogō de di, tunī anī keleī sã be, tunī momoiya sã disiyouf are, idi ā nigin wadã ideneik to douf de? <sup>24</sup> Anī ere, taka ī momoiya sã be, taka ī anī keleī sã, tamo kayau ganan profet od wogō de mog, isiyouf are, ī tamo kayau ganan neid wogōya bunem ī mosor tamo ya anī kisi fokō ye di, tamo kayau ganan ī es difiyēf, <sup>25</sup> age dife di, yogon wau bun iminēdig anī yaorouf. Anī nigin, ī kusureis fen, Negur yana yales, “Momoi bagai, Negur ā atun ibodok,” youf.

### *Negur Yana Suma Dōf Yaleseya*

<sup>26</sup> Anī nigin, turau tar, ada naig tafouf? Sain ā guru gef, ā ganan atun taka seg ado, taka faded fiya nē od ado, taka kurō fesiya od ado, taka od fire nem wogōya be, od fire nem wogōya anī falei fiya adof. Anī ganan sios megeir fiya nigin

---

\* **14:21:** Asaia 28:11, 12

ago gouf. <sup>27</sup> Taka ï od fire nem wogõ youf are, uru be, towom dogol age fiya sain dale fen, teke tekeleim wogõ douf. Age fe di, taka nem od fire nem wogõya anĩ falei fouf. <sup>28</sup> Od fire nem wogõya anĩ falei fiya tamo sãf are, wogõya tamo ï sios bun foro yel fen, yogo ado Negur bun wogõ youf.

<sup>29</sup> Profet uru be, towom age fiya wogõ douf, age de mog, tunĩ ganan, ereb wogõ yef anĩ el de es difouf. <sup>30</sup> Anĩ ere, idi guru fiya dibodok anidi atun, kurõ fesiya od taka, taka bun isiyouf are, uyu wogõ yef are dẽ yalauf. <sup>31</sup> Ere nigin, ã ganan sain waleg fen, teke tekeleim profet od wogõ gouf, anĩ bunem, ganan keleĩ dale fen, waud yalesauf. <sup>32</sup> Profet neid uur are profet dogo kulatun dife fen, dogo neid wogõya sain bun dogol wogõ douf. <sup>33</sup> Ere nigin, Negur ï ekul fiya nẽ Negur sã, ï wau inosiya nẽ Negur.

Tamo kayau fateul neid sios ganan bun age difedig gen, <sup>34</sup> kayau idi sios bun foro del difarauf. Idi wogõya nẽ modoũ to difenẽdiyof, anĩ ere, idi Lo irok kilei, anĩ dõ difouf. <sup>35</sup> Idi ereb taka nigin to fiya orodiyof are, idi neid fõ bun dogo neid tamo to difediyof, ere nigin, kayau taka sios bun wogõya are mama ado.

<sup>36</sup> Negur nẽ od ã bunem gariya inon de? Od anĩ ã bun dogol isin de? <sup>37</sup> Taka ï kisif, ï profet taka be, ï Awa Uur nẽ ege luwa alen youf are, ï ereb aya atotkeneik are Odug nẽ ïtãfiya ya anĩ keleĩ youf. <sup>38</sup> Taka ï enei welebi fouf are, ï yogo welebi fiyẽf.

<sup>39</sup> Anĩ nigin, turau tar, profet od wogõ gouf nigin kisi total walogouf. Agog fen, od fire nem wogõya nigin to katũ wiyẽdigouf. <sup>40</sup> Anĩ ere, ereb

ereb ganan suma bagai dōg fen, biya bagai ago gouf.

## 15

### *Kristus Nē Mata Kel Fāya*

<sup>1</sup> Turau tar, aya biya od wogō ayeī di, waleg fen, anī teten ufaregef anī, baban ā kisi turī ayeīf nigin orouf. <sup>2</sup> Ā od aya wogō ayein anī, uroug kafī waleg fen, ege to momoi gen ouf are, biya od enei bunem ā kel gei yeīf.

<sup>3</sup> Ere nigin, ereb aya alen, are odug bagai nigin, uyulil anī aya ā afenein, are Kristus ī, Negur nē Itotoya bun yenek kilei, neda mosor nigin laa fe di, <sup>4</sup> ī mū difen, are Negur nē Itotoya bun yenek kilei, naa towo bun ī mata kel fā yen, <sup>5</sup> are ī Pita bun wō ye fen, anī dumen in dō fiya tar tuwelf bun wō yen. <sup>6</sup> Anī bure fele di, ī sain tekelei bun tura tar faif handred wal fiya meleid bun wō yen, anidi ganan musei fau dibodok, tunī gare den. <sup>7</sup> Agef fen, ī Jems mala bun wō yen, anī dumen aposel ganan meleid bun wō yen. <sup>8</sup> Anī ganan bure fel fen, idikeleya bun, ī, aya kesu gō fiya sain sā bun gō difiyan gen anī, malau buneg wō yen.

<sup>9</sup> Ere nigin, aya aposel idi atun naal bagai, aya to biya nigin aposel yeya nigineg kisi feleya sā, ere nigin, aya Negur nē sios darau afenen. <sup>10</sup> Anī ere, Negur nē wau ifenēya bunem, aya gama afaref gen age wō aun. Aya bun yogon wau ifenēya anī ege to ilen. Sā, aya kabī totol idi ganan wal fediya alen, are ayam sā, anī ere, Negur aya ado ibodon in wau ifenēya anim. <sup>11</sup> Age fiya nigin,

ayam be, idim, amã enei wogõ mauf, are ã enei momoi gen.

*Gare Den Tamo Neid Mata Kel Fãya*

<sup>12</sup> Amã Kristus gare den anidi bun tamal mata kel fã yen anĩ wogõ maudig, anĩ ere, naig fe di, ã tunĩ, gare den anidi mata to ke de fã douf gedig? <sup>13</sup> Gare den anidi, mata to ke de fã douf are, Kristus ïg mata to kel fã yem. <sup>14</sup> Kristus ï mata to kel fã yem are, nemã wogõya anĩ kaũ sã di, ãgenei momoiya areg kaũ sam. <sup>15</sup> Age fiyam are, amã Negur nigin idegëya od wogõ maudig anĩ dilemam, ere nigin, amã Negur ï Kristus gare den anidi bun tamal turĩ fiyen anĩ kurõ mafesidig. Anĩ ere, Negur ï gare den anidi to turĩ fediyouf anĩ momoi ouf are, ï Kristus to turĩ fiyem. <sup>16</sup> Ere nigin, Negur ï gare den anidi to turĩ fediyouf are, ï Kristuseg to turĩ fiyem. <sup>17</sup> Negur ï Kristus to turĩ fiyem are, ãgenei momoiya are ege, ã ãgenei mosor bun fau ubodõgef. <sup>18</sup> Age fiyam are, idi Kristus nigin momoi de fen, gare den anidig fõ delem. <sup>19</sup> Ada ein mata ibodõya enei nigin dogol, Kristus bun wauda iseya adouf are, ada tamo ganan wal fediya maladalon ado.

<sup>20</sup> Anĩ ere, Kristus momoi bagai gare den anidi bun tamal kel turĩ fiyen, are idi gare den anidi bun tamal faat uyulil yun gen. <sup>21</sup> Are, laa are tamo tekelei bunem isin nigin, gare den neid kel fãya areg tamo tekelei bunem isif. <sup>22</sup> Are, Adam bun ganan gare dedig, age fiya gen, Kristus bun ganan mata ifenëdiyouf. <sup>23</sup> Anĩ ere, idi mugu mugu dogo neid sain bun age difouf: Kristus ï uyulil faat yũya, anĩ dumen, ï isiyouf sain bun, idi yogon

dibodok anidi, mata ke de fã douf. <sup>24</sup> Anĩ bure fele di, idikeleya sain isiyouf, sain anĩ bun, Kristus ã gawaman ganan, yeneid ado ganan, megeir ganan daũ fel fen, tano anĩ yale, Dei Negur ima bun inouf. <sup>25</sup> Ere nigin, ã king ibodok ile, yogon kiwai tar ganan yogo ye farumen inenēdiyof sain anĩ bun. <sup>26</sup> Kiwai idikeleya bun daũ fiya nē, are laa. <sup>27</sup> Are Negur nē Itotoya bun eig ye irok kilei, “Negur ã ereb ereb ganan yogo ye farumen inenēdin.”\* Sain ã irok, are ereb ereb ganan ã farumen inenēdin, are Negur ã ereb ereb ganan Kristus farumen inenēdin, Negur ã yogo enei farumen to ibodok ya anĩ yaor. <sup>28</sup> Sain Negur ã enei age fel fen, Naal yogo, Negur ã ereb ereb ganan Kristus farumen inenēdin anĩ, farumen inenēf, anĩ bunem, Negur ã ereb ereb ganan nē mudur ibodōf.

<sup>29</sup> Mata kel fãya anĩ sãf are, idi tamo gare den anidi nigin naan dalef idi naig difouf? Tamo gare den anidi to bagai kel turĩ fediyof are, ere nigin tamo kayau idi nigin naan daledig? <sup>30</sup> Takag, amã nigin, ere nigin amã mug sain ganan bouwamã willa bun manenēdig? <sup>31</sup> Turau tar, aya ã neda Odug Kristus Jesus bun ubodōgef nigin, yanau alesedig anĩ bunem, momoi bagai enei total bagai arok, are aya naa ganan laa bun eledig. <sup>32</sup> Aya tamo nē kisi bunem dogol, Efesus oun gaar kuĩ geid kusĩ aun ouf are, ere mala biya anĩ aya alen? Tamo gare den anidi to kel turĩ fediyof are, Negur nē Itotoya bun yenek kilei, “Saaf ado naan tãf,

---

\* 15:27: Sam 8:6

ere nigin, nil gare tauf.”†

<sup>33</sup> ã taka nem to idegneif. “Sane geid nigal yūya bun, tobonunā biya daū fedig.” <sup>34</sup> Kisi biya bun kel usig ufareg fen, mosor inoya utorōg, ere nigin, ã atun tunī Negur nigin keleī sã difaref. Aya ã mama yeif nigin enei wogō auf.

### *Kel Fāya Nē Bouwa*

<sup>35</sup> Anī ere, taka nem to fouf, “Tamo gare den anidi, naig fe kel turī fediyouf? Bouweid naig fiya bagai ado disiyouf?” <sup>36</sup> ã neneya bagai! Ereb ō tu wouf anī, to laa fouf are, anī mata to wō youf.

<sup>37</sup> Sain ō tu wof, ō fau ibodōf nē bouwa anī to utenek, anī ere, wit be, ereb taka nē faat dogol.

<sup>38</sup> Anī ere, Negur ī oron kilei, bouwa ifenēdig, agef fen, ī faat fire fire dogo neid bouweid fire fire ifenēdidig. <sup>39</sup> Bouwa ganān tekelei sã. Tamo nē bouwa are fire, gaar bouwa fire, ninā bouwa fire, gau bouwa fire. <sup>40</sup> Saa ilun nē bouweid ado di, tenebur nē bouweideg ado. Anī ere, saa ilun nē bouweid fula fiya medeīya fire di, tenebur nē bouweid fula fiya medeīya areg fire. <sup>41</sup> Gaa are futu reya fire di, ogō are futu reya fire, age fe di, barisa are futu reya fire. Barisa idi atuneg futu reya fire fire ado.

<sup>42</sup> Age fiya gen, tamo gare den anidi neid mata kel fāya areg age fouf. Bouwa tu fiyaf nē are bura le di, bouwa kel fā yef nē are to bura ledig. <sup>43</sup> Sane bun tu fiya di, fula fiya medeīya bun kel fā yef. Totol sã tu fiya di, totol ado kel fā yef. <sup>44</sup> Bouwa buru maug are tu fiya di, uur nē bouwa are kel fā yef.

---

† 15:32: Asaia 22:13

Bouwa buru maug ibodok are, uur nē bouwag ibodok. <sup>45</sup> Anī nigin, Negur nē Itotoya bun eig ye irok, “Uyulil inon tamo Adam ī mata ibodōya wō yen.” ‡ Idikeleya Adam ī mata ifenēya nē uur wō yen. <sup>46</sup> Uur nē bouwa ketem to isin, anī ere, bouwa buru maug ketem isin. Age fe di, anī dumen, uur nē bouwa. <sup>47</sup> Uyulil inon tamo are tenebur aas nē, anī dō fiya tamo are saa ilun nē. <sup>48</sup> Tenebur nē tamo idi, tamo teneub nem inon gen. Saa ilun nē tamo idig, tamo saa ilun tamal gen. <sup>49</sup> Ada tenebur tamo inon age fiya tabodok gen, adag tamo saa ilun tamal age fiya tabodōf.

<sup>50</sup> Turau tar, aya ã arokeneik, are tenebur nē bouwam Negur nē tano to akorou youf. Ereb bura ledig anīg to bura lauf anī to akorou youf. <sup>51</sup> Karī wog, aya waa taka arokeneif: Ada ganan to gare tauf, anī ere, ada ganan bouwada falei fouf, <sup>52</sup> are ereb fli yeleya be, mala Kamisāya gen idikeleya nē taur aitouf bun, bouwada agef falei fouf. Taur aite di, tamo gare den anidi kel turī fedi di, to buraya nē ado fã douf, age fe di, ada bouwada falei fouf. <sup>53</sup> Are, buraya nē anī to burauf nē anī ifonūf. Laa fiya nē anī to laa fouf nē anī ifonūf. <sup>54</sup> Buraya nē anī to burauf nē anī ifonūf, laa fiya nē anī to laa fouf nē anī ifonūf sain anī bun, Negur nē Itotoya bun ibodok enei agef kisi fel wō youf, “Negurem kusī bun laa wal fe fen, anī adok itob len.” §

<sup>55</sup> “O laa, ogon kusī wal fiya nē megeir nain?

O laa, ogon waila nain?”\*

---

‡ 15:45: Jenesis 2:7    § 15:54: Asaia 25:8    \* 15:55: Hosia 13:14



<sup>56</sup> Laa nē waila are mosor, mosor nē megeir are lo. <sup>57</sup> Anī ere, Negur de tafiyēf! Ī neda Odug Jesus Kristus bunem kusī wal fiya ifanadadig.

<sup>58</sup> Anī nigin, neu turau tar oboiyou, totol ufareg. Ereb takam to yokū yeif. Faimud Odug nē kabī fatuk bagai walogouf, ere nigin, ā keleī, are ā Odug bun kabī walegef anī, ege to ilauf.

## 16

### *Negur Nē Tamo Kayau Isennēdiya Nigin Kolekta*

<sup>1</sup> Gama Negur nē tamo kayau isennēdiya nē kolekta nigin, ereb aya Galesia sios age difouf nigin arokenēdin anī ago gouf. <sup>2</sup> Uub ganan nē naa matu bun, ā mugu mugu, augeneī moni walededig anī foig, fire unog fen, kuru gouf, anī bunem, sain aya asiyouf bun, kolekta baban to unogouf. <sup>3</sup> Sain aya wō auf, tamo ā ugirnēdigen anidi bun, pas afeneīd fen, āgenei ege luwa ado Jerusalem sur afediyouf. <sup>4</sup> Ayag idi geid ileya nigin deuf are, idi aya geid weim malauf.

### *Pol Nē Wau Irōya*

<sup>5</sup> Aya Masedonia provins atu atu ele fen, ā gein asiyouf, ere nigin, aya Masedonia atu atu alauf. <sup>6</sup> Aya ā geid sain naal tabodōf be, yau ado menig sain bun ā geid tabodōf, anī bunem, ā neu iyōya nain be alauf bun usennagauf. <sup>7</sup> Aya gama ā ailiyei ken, sain naal ki yeīya anī to orouf. Odug yo youf are, aya sain naal meluk ā geid tabodōf anī wau irok. <sup>8</sup> Anī ere, aya Efesus ein abodok ele, Pentikos naa wō youf, <sup>9</sup> ere nigin, kabī kaū ado nē

sukar odug, aya bun kā fen, age fe di, musei aya kiwai difanaf.

<sup>10</sup> Timoti isiyouf are, ã ã geid ibodōf bun, ã ereb taka nigin to kumĩ youf nigin lo welegei, ere nigin, ã aya gen Odug nē kabĩ faali fef. <sup>11</sup> Anĩ nigin, taka nem ã yaleya nigin to itorōf. Yogon delē bun wau inosiya ado sur wiyēge di, ã aya gein kel isiyouf. ã tura tar geid disiyouf nigin, aya ololo afedif.

<sup>12</sup> Neda turada Apolos nigin, ã tura tar geid ã gein dilauf nigin, aya total bagai arokenen. ã gama ileyā nigin wau yenēya sã, anĩ ere, ã ileyā nigin sain biya isiyouf are, ã ilauf.

<sup>13</sup> Lo welegei, momoiya bun total ufareg, tamo total ado kumĩ sã wōg, total waleg. <sup>14</sup> Ereb ererb ganān wau laa fiya bun ago gouf.

<sup>15</sup> ã keleĩ, are Stefanas nē ibor, Akaia provins oun uyulil momoiya tamo kayau wō de fen, idi dogo neid oroya dō de, Negur nē tamo kayau disennēdiyof nigin, kabĩ total daledig. Turau tar, aya total bagai arokeneik, <sup>16</sup> are ã eneidi age fediya ado, idi ganān kabĩ bun disi fen, kabĩ dalef anidi farumen ubodōg. <sup>17</sup> Sain Stefanas, Fotunatus ado, Akaikus wō den, aya wau al fen, ere nigin, ereb ã bun tamal ifanamāya anĩ, idim ã fotokar difanamān. <sup>18</sup> Are, idi age dife di, neu uur ado āgeneig filolō fen. Anĩ nigin, tamo age fediya nigin de fiyēdiya nē kisi walogouf.

### *Idikeleya Nē Aanya*

<sup>19</sup> Asia provins bun sios idi, ã bun aanya sur difef. Akwila Prisila ado aanya, wau sere fiya ado Odug bunem ã bun sur difef. Sios idi neid fō bun guru difedig idig age difef. <sup>20</sup> Ein tureĩ tar ganān ã

bun aanya sur difef. ã abob aan wiyẽg fen, fateul bunem umã gouf.

<sup>21</sup> Aya, Pol imaum bagai aanya enei atotof.

<sup>22</sup> Taka ã Odug nigin wau to laa foug are, isisãya ã bun isiyouf. O Odug, usi!

<sup>23</sup> Odug Jesus nẽ wau ifenãya, ã bun ibodõf.

<sup>24</sup> Neu wau laa fiya, Kristus Jesus bunem ã ganan bun ibodõf. Momoi.

**Mata Ifeněya Ně Od**  
**The New Testament in the Marik Language of Papua**  
**New Guinea**  
**Nupela Testamen long tokples Marik**

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

**The New Testament**

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

---

PDF generated using Haiola and XeLaTeX on 21 Feb 2024 from source files dated 31 Aug 2023

d7099f9d-3bdf-5620-8eb3-7e6c51cab7ea